

բանակների գէնքի յաջողութեան և արժանացաւ անգլիական ու Փրանսական հրամանատարութեան գովասանքին ու բարձր գնահատութեան:

Բացի զուտ ազգային ձեռնարկներից՝ հայ կամաւորական խմբեր և անհատ մարտիկներ մասնակցեցին պատերազմին և ուրիշ ճակատներում՝ դաշնակիցների գանադան զորամասերի մէջ — Փրանսական և ամերիկեան բանակներում: Եթէ հաշուելու լինենք բոլոր ճակատներում և բոլոր բանակներին մասնակցող հայ զինուորների ու կամաւորների ընդհանուր թիւը, հայ ժողովուրդը, ամենահամեստ հաշուով, մօտ 300,000 կուռղ տրամադրեց դաշնակիցներին պատերազմի ամբողջ տեւողութեան ընթացքին: Եւ վարձատրութիւնը...

Ռուսաստանում տեսանք այդ վարձատրութիւնը—բացարձակ խաբէութիւն ու զրկանք: Նոյնը կատարւեց և Եւրոպայում: Մի կողմից Փրանսական և անգլիական կառավարութիւնները հրապարակով յայտարարում էին, որ պատերազմի նպատակներից մէկն էլ Հայաստանի ազատագրութիւնն է, միւս կողմից, զիւանագիտական առանձնասենեակներում, գաղտնի կերպով բանակցում էին Հայաստանի բաժանման մասին: Հայաստանի անդամահատութեան ծրագիրն, ի վերջոյ, հաստատուեց առանց հաշի առնելու հայ ժողովրդի շահերն ու բաղձանքները:

Այսպիսով, թէ Ռուսաստանում և թէ արտասահմանում հայ ժողովրդի բոլոր յոյսերն ի դերեւ ելան: Խաբւած ու լքւած դաշնակիցներից, աւերած ու ջարդւած իր հայրենիքում, ծանրաբեռնւած հարիւր հազարաւոր գաղթականներով ու պատերազմի զոհերով, առանց հեռանկարի, հայ ժողովուրդը նմանը չտեսած տաղնապով ոտք կոխեց 1917 թւականը: Եւ ով գիտէ ի՞նչ կը լինէր վախճանը, եթէ վրա չհասնէր հրաշքը —

1917 թւի փետրւարին, բոլորովին անսպասելի կերպով, պայթեց Ռուսական Մեծ Յեղափոխութիւնը: